

Huez a duda riba palabra di mucha cu a wordo abusa:

Fundacion Lisette Gomez y mayornan ta frustra, tristo, decepciona y rabia cu veredicto

ORANJESTAD (AAN) – Fundacion Lisette Gomez y e mayornan di e criatura cu a declara den Corte, despues di a conta su mama e hecho, cu e meneer di e lugar di cuidu unda e ta bay, (cu ademá ta meneer di musica), a mishu cu su e partinan priva di su curpa, ta sumamente decepciona, tristo y rabia, pasobra e mucha su palabra ta bal cero pa e Huez.

Ta trata di un mucha cu a wordo siña for di chikito kico ta abuso sexual di mucha y con pa cuida su mes, y pesey e mesun dia e sucedido el a conta su mama kico a pasa cune, y Diahuebs mainta Huez a duna veredicto cu no tin suficiente prueba cu e meneer ey a mishu cu e criatura.

E pregunta den pueblo ta na unda e derechonan di mucha ta keda. Den e caso aki e mucha no por tin testigo, tampoco prueba pasobra si no tin penetracion, y e casonan di mishimento ta keda difícil na Aruba y esaki ta hopi frustrante.

Lisette Gomes, den un entrevista ta señala cu e mayornan ta hopi decepciona, cu hopi dolor y masha tristo pasobra nan ta kere nan yiu, anto un Huez ta bisa cu e palabra di e mucha no tin suficiente peso pa condena e mucha aki.

Ta trata aki di un Huez Arubiano, sra. Gomez a menciona. Loke nan mas ta lamenta ta cu nan a bay Corte tres biaha cu e mesun caso aki, y nan tin e pregunta pakico si no tabata tin suficiente prueba, a pone anto un mayornan bin Corte atrobe.

Nan a sinta den e mesun sala cu e persona cu nan a confia nan yiu pa mas cu seis aña cu e mucha a bay na e scol aki, pa Huez bisa cu e sospechoso a declara cu e no a comete e mishimento pero den Corte luna pasa, el a declara cu por ta door di kishikimento e por a mishu cu e mucha.

Gomez ta puntra su mes, un homber riba 65 aña di edad cu ta bisa cu “di baina e ta na scol” anto ki mishu ta kishiki un mucha di seis aña. E no ta cuadra. Di un banda e ta bisa cu e no ta na scol,



pero e ta biba eynan. Pues, el a contradeci su mes na varios ocasion den Corte, anto pa despues Huez bisa toch cu e no a acepta y cu no tin suficiente prueba pa dune un castigo tampoco! Sra. Gomez a indica cu e homber a declara cu e ta

pasa den camber di e muchanan cu otro hende ta cuida, pa e bay su camber, y e ta puntra si e scol aki ta bolbe habri, lo tin mayornan cu lo hiba nan yunan aki? E ta duda! E homber a cera su scol pasobra mayornan a haya sa

di kico e ta wordo acusa y mayoria a kita nan yunan di eynan.

Otro aspecto cu a laga di de-sea ta e investigacion di KZP, y e Huez mes a menciona cu nan no a bay scol pa wak e situacion con e cambenan ta, no a papia cu e leidster pa wak si e homber enberdad no teynan, of cuanto ora e ta bay pa dia pa wak si enberdad ta cuadra cu loke e homber a declara.


Vooral e temporada di November cu e caso a sosode, cu e meneer a bisa cu e casi no ta bay e cas pasobra e ta bezig cu gaita pues, e tabata tin tur manera di tapa su mes.

E persona aki ta duna e muchanan les un biaha pa

siman y sra. Gomez ta bolbe puntra ta ki confianza e homber aki di 65 aña tin, pa mishu cu un mucha chikito di diez aña.

Mayornan ta kere nan yiu, pasobra si nan no kere den dje ta ken anto? Sra. Gomes a menciona cu e mama a hiba su yiu cerca un psicologo den exterior y a bin sali afo cu e homber aki tabata prepara e mucha aki, pa yega asina leu di abusa di dje. E homber a acepta den Corte cu e tabata yama e criatura “su casa chikito”. Apesar cu tin hopi señal e homber a haya su libertad Diahuebs, locual ta hopi frustrante pa e famia y pa e fundacion cu ta sigui den su lucha contra abuso di mucha!

Bishita di UNICEF y Augeo Foundation den cuadro di preparacion y implementacion di meldcode na Aruba



ORANJESTAD (AAN): Manera ta conoci caba, UNICEF ta brindando apoyo tecnico pa diferente aspecto di e crisis social, cual ta inclui abuso di menor. Reciencientemente Augeo Foundation di Hulanda hunto cu UNICEF a ofrece nan asistencia pa loke ta trata e implementacion di un meldcode pa Aruba.

Den cuadro di esaki e dos intancianan aki tabata na Aruba siman pasa unda e reuni cu tur stakeholder den Social Crisisplan pa asina especifica e pasonan necesario cu mester tuma lugar pa yega na implementacion di un meldcode na Aruba.

A reuni tambe cu minister Glenbert Croes riba loke ta e proceso cu mester sigui encamina pa sigura e pro-

teccion y siguridad di tur mucha. Diasabra 1 di juni ultimo a drenta na vigor articulo 243 di e Codice Civil nobo unda ta regula e posicion, tareanan y autoridad di un punto central pa conseho, sosten, registracion di tur caso y preocupacion cu tin di haber cu abuso y negligencia di menor. Bureau SosteneMi a keda apunta como e punto central aki door di Consejo di ministronan.

Awor cu a oficialisa e punto central di registracion of meldpunt, ta sigui cu e siguiente proceso cu ta trata e implementacion di un meldcode. Un meldcode ta ensera un plan di accion specifico cu mester worde sigui door di cada sector, departamentu of organizacion ora tin un



caso di abuso di menor.

Ta trahando intensivamente pa oficialisa e meldcode hunto cu un vertrouwensarts. UNICEF y Augeo Foundation ta duna tur partners den Social Crisisplan e apoyo tecnico riba e aspecto aki pa asina e proceso di introduccion di meldcode ta un rapido y efectivo mirando nan expertisio riba e tema aki. Augeo Foundation a traha di cerca y a conseha gobierno Hulandes tempo cu nan a introduci meldcode contra abuso na Hulanda na juli 2013. Tambe Augeo Foundation ta duna conseho y ta train 60 mil profesional Hulandes riba e tema di meldcode pa aña.

E reunionnan entre UNICEF, Augeo Foundation, partners den Social Cri-

sisplan y minister Glenbert Croes a bay hopi bon. A haci palabracionnan concreto pa asina yega na introduccion di un meldcode pa Aruba y pa cada sector, esta social, enseñansa, husticia y salubridad publico.

Na nan turno cada sector lo reuni cu departamento y organizacion cu ta resorta bou di nan pa asina tur tin un meldcode contra abuso di menor. Gobierno hunto cu partnernan riba tereno social ta convenci cu implementacion di e meldcode lo ta un stap importante den e lucha contra abuso di menor.

E potretnan ta muestra reunionnan cu a tuma lugar siman pasa entre UNICEF, Augeo Foundation, partners den Social Crisisplan y minister Glenbert Croes.